

Ekwo Ezura

*Sayirosu atụ ekemu gę ndu a kpuru lę ndzụ
laphu azu*

(2Iphę 36:22-23)

¹ O be l'apha kę mbụ, Sayirosu wataru aburu eze ndu Peshiya; Chipfu nwusaa Sayirosu, bu eze ndu Peshiya obu; o raa ozi arara l'alị-eze iya l'ophu; bya edekwapho ozi ono edede l'ekwo. Iphe ono buru g'ee-shi g'opfu ono, Chipfu shi l'onu Jieremaya pfua ono vukota.

² Waa iphe, Sayirosu, bu eze ndu Peshiya pfuru baa:

“Chipfu, bu Chileke k'imigwe nukotawaru mu alị-eze, nokota lę mgboko-a; bya asuwa mu gę mu kpuru iya ụlo lę Jierusalemu ono, du l'alị Jiuda. ³ Iphe, bukpuo onye kę Chileke, no l'echilabo unu; gę Chileke iya ono swikwaru iya okpobe eswiru. G'onye obu tugbua lashia Jierusalemu ono, du l'alị Jiuda je akpuo ụlo Chipfu, bu Chileke kę Izurelu; mbu Chileke ono, no lę Jierusalemu. ⁴ A -bya lę ndu phoduru nu l'eka-a ephe lwaru alwalwa-a; gę ndu ephe bu l'eka iya nkephe gude mkpola-ochaa; me mkpola-ododo yetaru phe eka; ephe anu phe ivu ozo, du iche iche; me iphe-edobe; mewaro iphe ozo, shi phe l'obu futu g'ephe gude je akpuo ụlo Chileke lę Jierusalemu.”

⁵ Tòbudu iya bụ; ndu bụgbaa ishi l'unuphu l'unuphu; l'ipfu Jiuda; mę ke Benjaminu; mę ndu-uke Chileke; mę ndu Lívayi; mbụ iphe, bụkpoo onye Chileke yeru iya l'obu tuko wulihu jeshia akpụ ụlo Chipfu ono lẹ Jierúsalemụ.

⁶ Ndu obutobu phẹ gwerụ ivu mkpọla-ododo mę mkpọla-ọchaa nụ phẹ gude yetarụ phẹ ẹka; me ivu ọzo, dụ iche iche; mę iphe-edobe; mę iphe, vugbaa okaswa; a -gufukwa iphe, shi phẹ l'obu futa, ẹphe nuchaaru phẹ.

⁷ Eze, bụ Sayirosu gwefutakwapho ivu ụlo Chipfu ono, Nebukadineza shi gweta lẹ Jierúsalemụ je edobe l'ụlo agwa iya phọ.

⁸ O bụru onye edobeje okpoga, ẹpha iya bụ Mituredatu bę Sayirosu, eze ndu Peshiya shi l'ẹka iya gwefuta ivu ono. Onye ono woru iya gwa ọgu nụ Sheshubaza, bụ onye-ishi ndu Jiuda.

⁹ Waa g'ivu ono ha baa:

Gbamugbamu mkpọla-ododo
 bę dụ ụkporo l'iri;
 gbamugbamu
 mkpọla-ọchaa dụ
 ụnu labọ l'ụkporo iri;
 iphe, eegudeje akpọ
 ụnwù-isensu oku,
 ẹ meru lẹ mkpọla-ọchaa
 dụ ụkporo lẹ tete.

¹⁰ Ochi, e meru lẹ
 mkpọla-ododo dụ
 ụkporo l'iri.

Ochi, e gude
 mkpọla-ọchaa mee,
 l'udu iya l'udu iya

dụ ụnu ochi l'ochi iri.
 Ụnwu ivu ọzo, dughbaa
 nụ dụ ụnu l'ụkporo iri.

¹¹ Ivu, e meru lẹ mkpọla-ododo; mę ke mkpọla-ọchaa bę dụ ụnu iri l'ẹto l'ụkporo iri. Ivu ono g'ọ ha bụ ivu, Sheshubaza gwelataru teke ndu ono, a kpuru lẹ ndzụ laa alị Bábilonu ono lwarụ Jierúsalemụ.

2

Ndu lwarụ nụ lẹ ndu ono a kpuru lẹ ndzụ ono

¹ Waa ndu Ízurelu ono, shi l'alị Bábilonu lwa; mbụ ndu ono, a kpụjeru lẹ ndzụ laa alị ọzo, bụ iya bụ ndu Nebukadineza, bụ eze ndu Bábilonu kpụkojeru laa Bábilonu. Ẹphe lwarụ Jierúsalemụ; mę Jiuda; onyenonu lashichaa mkpụkpu ẹka o shi. ² Ndu ẹphe tso lwa bę bụ Zerúbabelu; mę Jieshuwa; mę Nehemaya; mę Seraya; mę Relaya; mę Mọdekayi; mę Bilishanu; mę Misupa; mę Biguvayi; mę Rehumu; waa Bana.

Waa gę ndu Ízurelu ono ha bụ ọwana:

- ³ Oshilọkpa Paroshi bę dụ
 unu ise l'ụkporo ụmadzu ẹsato;
 l'ụmadzu iri l'ẹbo.
- ⁴ Oshilọkpa Shefataya dụ
 ụkporo ụmadzu iri l'ẹsato
 l'ụmadzu iri l'ẹbo.
- ⁵ Oshilọkpa Ara dụ ụnu
 l'ụkporo iri l'ẹsato
 l'ụmadzu iri l'ise.
- ⁶ Oshilọkpa Pahatu-Mówabu,
 bụ iya bụ ndu shi l'eri

- Jieshuwa yẹle Jiowabu
 bẹ dọ unu ẹsaa l'iri l'ẹbo.
- 7 Oshilọkpa Elamu dọ unu
 ẹto l'umadzu ukporo labọ
 l'umadzu iri l'ẹno.
- 8 Oshilọkpa Zatu dọ unu
 labọ l'ukporo ẹsaa
 l'umadzu ise.
- 9 Oshilọkpa Zakayi dọ unu
 l'umadzu ukporo iri l'ẹsato.
- 10 Oshilọkpa Bani dọ unu
 l'umadzu ukporo ugbo iri
 l'ẹbo l'umadzu labọ.
- 11 Oshilọkpa Bebayi dọ unu
 l'umadzu ukporo iri le
 nanu l'onye lanu.
- 12 Oshilọkpa Azugadu dọ
 unu ẹto l'umadzu ukporo
 l'ẹbo.
- 13 Oshilọkpa Adonikamu
 dọ unu l'umadzu ukporo
 iri l'ẹto l'umadzu ishii.
- 14 Oshilọkpa Biguvayi dọ
 unu umadzu ise l'umadzu
 ukporo labọ l'umadzu
 iri l'ise.
- 15 Oshilọkpa Adinu dọ unu
 l'umadzu ukporo labọ
 l'iri l'ẹno.
- 16 Oshilọkpa Ateya, bu iya
 bu ndu shi l'eri Hezekaya bẹ
 dọ ukporo ẹno l'umadzu iri
 l'ẹsato.
- 17 Oshilọkpa Bezayi dọ ukporo

- umadzu iri l'ishii l'umadzu ẹto.
- 18 Oshilokpa Jiora du ukporo
ise l'umadzu iri l'ẹbo.
- 19 Oshilokpa Hashumu du
ukporo iri le nanu
l'umadzu ẹto.
- 20 Oshilokpa Gibaru du ukporo
eno l'umadzu iri l'ise.
- 21 Unwoke, shi le Betulehemu
be du ukporo ishii
l'umadzu ẹto.
- 22 Ndu ke Netofa be du ukporo
labo l'umadzu iri l'ise.
- 23 Ndu ke Anatotu du ukporo
ise l'umadzu esato.
- 24 Ndu ke Azumavetu be du
ukporo labo l'umadzu
labo.
- 25 Ndu ke Kiriyatu-Jiarimu;
me Kefira; me Berotu be
du unu l'umadzu ukporo
iri l'esaa l'umadzu ẹto.
- 26 Ndu ke Rama yee Geba
du unu l'umadzu ukporo
iri le nanu l'umadzu ẹto.
- 27 Ndu ke Mikumashi du
ukporo ishii l'umadzu labo.
- 28 Ndu ke Betelu; me Eyayi du
ukporo iri le nanu
l'umadzu ẹto.
- 29 Ndu ke Nebo du ukporo
labo l'umadzu iri l'ẹbo.
- 30 Ndu ke Magubishi du ukporo
esaa l'umadzu iri l'ishii.

- 31 Ndu ke Elamu ophunapho be
du unu eto l'ukporo
labo l'umadzu iri l'eno.
- 32 Ndu ke Harimu du ukporo
iri l'ishii.
- 33 Ndu ke Lodu; me Hadidi;
me Ono be du unu l'umadzu
ukporo iri l'ishii l'umadzu ise.
- 34 Ndu ke Jieriko du ukporo iri
l'esaa l'umadzu ise.
- 35 Ndu ke Senaa du unu tete
l'ukporo l'iri.
- 36 A bya le ndu-uke Chileke:
Oshilokpa Jiedaya, bu iya bu
ndu shi l'onu-ulo ndibe
Jieshuwa be du unu labo
l'ukporo esato l'umadzu
iri l'eto.
- 37 Oshilokpa Ima du unu labo
l'ukporo iri l'ebo l'umadzu
iri l'ebo.
- 38 Oshilokpa Pasho du unu
eto l'ukporo labo
l'umadzu esaa.
- 39 Oshilokpa Harimu du unu
labo l'ukporo iri l'umadzu
iri l'esaa.
- 40 A bya le ndu Lívayi:
Oshilokpa Jieshuwa; me
Kadumelu, bu iya bu ndu
shi l'eri Hodavaya be du
ukporo eto l'umadzu
iri l'eno.
- 41 A bya le ndu aguje ebvu:

Oshilokpa Asafu be du
 ukporo ishii l'umadzu
 esato.

⁴² A bya le ndu anoduje eche
 nche l'onu-abata
 eze-ulo Chileke:

Oshilokpa Shalumu; me
 oshilokpa Ateya; me
 oshilokpa Talumonu;
 me oshilokpa Akubu;
 me oshilokpa Hatita;
 me oshilokpa Shobayi;
 be tukoru du ukporo ise
 l'umadzu iri le tete.

⁴³ A bya le ndu anoduje eje
 ozi l'eze-ulo Chileke bu:

Oshilokpa Ziha; me
 oshilokpa Hasufa;
 me oshilokpa Tabayotu;
⁴⁴ me oshilokpa Kerosu;
 me oshilokpa Siyaha;
 me oshilokpa Padonu;
⁴⁵ me oshilokpa Lebana;
 me oshilokpa Hagaba;
 me oshilokpa Akubu;
⁴⁶ me oshilokpa Hagabu;
 me oshilokpa Shamulayi;
 me oshilokpa Hananu;
⁴⁷ me oshilokpa Gidelu;
 me oshilokpa Gaharu;
 me oshilokpa Reyaya;
⁴⁸ me oshilokpa Rezinu;
 me oshilokpa Nekoda;

mę oshilokpa Gazamu;
 49 mę oshilokpa Uza;
 mę oshilokpa Paseya;
 mę oshilokpa Besayi;
 50 mę oshilokpa Asuna;
 mę oshilokpa Meyuni;
 mę oshilokpa Nefisimu;
 51 mę oshilokpa Bakubuku;
 mę oshilokpa Hakufa;
 mę oshilokpa Hahuru;
 52 mę oshilokpa Bazulutu;
 mę oshilokpa Mehida;
 mę oshilokpa Hasha;
 53 mę oshilokpa Bakosu;
 mę oshilokpa Sizera;
 mę oshilokpa Tema;
 54 mę oshilokpa Nezaya;
 mę oshilokpa Hatifa.

55 A bya l'oshilokpa ndu
 ojozi Solomonu be bu:

Oshilokpa Sotayi;
 mę oshilokpa Hasoferu;
 mę oshilokpa Peruda;
 56 mę oshilokpa Jiala;
 mę oshilokpa Dakonu;
 mę oshilokpa Gidelu;
 57 mę oshilokpa Shefataya;
 mę oshilokpa Hatilu;
 mę oshilokpa
 Poreretu-Hazebayimu;
 mę oshilokpa Ami.

58 Ndu anoduje eje ozi
 l'eze-ulo Chileke

g'ẹ̀phe ha; mẹ oshilọkpa
 ndu ojozi Sólomọnu
 bẹ dọ ọkporo iri lẹ tete
 l'umadzu iri l'ẹbo.

⁵⁹ Waa ndu ọp̄hu shi lẹ mkp̄ukpu Tẹlu-Mela; mẹ lẹ mkp̄ukpu Tẹlu-Hasha; mẹ lẹ mkp̄ukpu Kerubu; mẹ lẹ mkp̄ukpu Adanu; mẹ lẹ mkp̄ukpu Ima Iwa bọ ọwana: Ọle ndu ono ta adudu ike goshi ipfu, ẹphe bọ; mẹ oshilọkpa onye ẹphe bọ; k'ọp̄hu ee-shi nno maru l'ẹphe bọ ndu Ízurelu.

⁶⁰ Oshilọkpa Delaya; mẹ oshilọkpa Tobaya; mẹ oshilọkpa Nekoda bẹ dọ unu l'ọkporo iri l'ẹbo l'umadzu iri l'ẹbo.

⁶¹ A bya l'oshilọkpa ndu-uke Chileke: oshilọkpa Habaya; mẹ oshilọkpa Hakọzu; mẹ oshilọkpa Bazilayi; nwoke ono, luru nwada Bazilayi kẹ Giladu; a nọdu ekuwa iya rọ ẹpha ala l'ẹpha iya. ⁶² Ndu ono bẹ a chọru ẹpha p̄hẹ l'ẹkwo, e deru g'e gude nwushia p̄hẹ; ọle a ta humaduru ẹpha p̄hẹ l'ẹkwo ono. Ọo ya bọ; e wofu p̄hẹ l'ọnodu ndu-uke Chileke mee p̄hẹ ẹphe buru ndu aasọ nsọ. ⁶³ Ọchi-ọha bya asọ g'ẹ̀phe te tsojeshi ria nri, kakọta adu nsọ jeye teke onye uke Chileke, e-gude Urimu; waa Tumimu kpata ishi l'ẹka Chipfu.

⁶⁴ Mkpakọ ndu ono, lwaru nọ ono g'ẹ̀phe ha dọ ọkporo unu ise l'unu ise l'ọkporo iri l'ẹsato;* ⁶⁵ a -gufukwa ndu-ozì p̄hẹ unwoke; mẹ unwanyi. Ndu k'ono dọ unu iri l'ẹsato l'ọkporo ishii l'umadzu iri l'ẹsaa.† Ẹphe nwekwarupho

* **2:64** 2:64 Bọ iya bọ 42,360 lẹ mbekee. † **2:65** 2:65 Bọ iya bọ 7,337 lẹ mbekee.

ndu aguje ebvu, du ukporo iri; unwanyi yee unwoke.

⁶⁶ Inya phe du unu l'ukporo iri l'ishii; l'inya iri l'ishii; inya-mulu phe du ukporo iri l'ebo l'inya-mulu ise. ⁶⁷ Inya-kamelu phe du unu l'ukporo l'iri l'ise; nkafu-igara du unu iri l'ishii l'ukporo iri l'ishii.‡

⁶⁸ Ephe rwua l'ulo Chipfu le Jierusalem; o duru ndu bugbaa ishi l'onu-ulo l'onu-ulo wotaru iphe, shi phe l'obu nu g'e gude kpukwaa ulo Chileke ono g'o du g'oshi du. ⁶⁹ Ephe meru g'ike phe beru woru mkpola-ododo, du ukporo unu ugbo esaa; l'unu iri l'ebo; l'ukporo iri; nu g'e dobe l'ulo eku, ee-gudeje jee ozi ono; bya anu mkpola-ochaa, du ukporo unu ugbo ukporo l'iri le nanu; l'unu ise; bya anufua uwe ndu-uke Chileke, du ukporo ise.

⁷⁰ Ndu uke Chileke; me ndu Liviayi; me uphodu ndu ono; me ndu aguje ebvu; me ndu echeje onu-oguzo nche; me ndu anoduje eje ozi l'eze-ulo Chileke be buchaa le mkpukpu nkephe. Ndu Izurelu g'ephe ha bukwarupho le mkpukpu nkephe.

3

Aakupwa oru-ngweja Chileke

¹ O rwua l'onwa k'esaa; ndu Izurelu tuko g'ephe ha gude obu lanu dzukobe le Jierusalem. Teke ono be ndu Izurelu bukotawaa le mkpukpu eka ephe shigbaa. ² Tobudu iya bu; Jieshuwa, nwa Jiozadaku ephe

‡ 2:67 2:67 Bu iya bu nkafu-igara du 6,720 le mbekee.

l'unwunna iya, bu iya bu ndu-uke Chileke; me Zerúbabelu, nwa Sheyalutiyelu epe l'unwunna nkiya wulihu kpuaa oru-ngweja Chileke ke Ízurelu; k'ophu epe e-gwe ngweja-akpo-oku l'eli iya; g'e deru iya l'ekwo-ekemu Mosisu, bu onye ke Chileke. ³ Epe kpua oru-ngweja ono l'eli eka e shi tuhawa okpa iya; kele epe atsụ ndu ono, bu l'alị ono ebvu; bya egweeru Chipfu ngweja-akpo-oku l'eli iya; mbụ epe gwee ngweja ono l'utsu me l'uzenyashi. ⁴ Epe bokwapho Obo-Mkpù; boọ ya g'e deru iya l'ekwo; bya egwee ngweja-akpo-oku, eegweje mboku-mboku l'obo-iphe ono. Ngweja ono be epe gweru ugbo ole, ekemu iya suru g'e gweje iya le mboku le mboku. ⁵ E mecha; epe bya egweaha ngweja-akpo-oku ono, eegweje tekenteke ono; me ngweja, eegweje l'obo onwafufu; me ngweja ozo, eegweje l'obo-iphe e dobegbaaru Chipfu iche; mekwapho ophu onyemonye wotagbaaru iphe, o turu obu iya onyo nu Chipfu. ⁶ E -shi le mboku mbu l'onwa k'esaa ono be epe wataru egwe ngweja-akpo-oku anu Chipfu. Obenu l'e teke atudu okpa eze-ulo Chipfu teke ono.

Aakpukwa eze-ulo Chipfu

⁷ Epe woru okpoga nu ndu akpuje ulo; me ndu kapyinta; woru nri; me iphe-angungu; me manu nu ndu Sayidonu; me ndu Taya k'ophu epe e-shi l'ubvu ubvu Lebanonu vufutaru phe oshi sida l'eze-enyimu; mbu vufutaru phe iya le Jiopa, bu iya bu ge Sayirosu, bu eze ndu Peshiya kweru g'ephe vuta. ⁸ L'onwa k'ebo

l'apha, kwe apha labo, ephe byarwutaru l'ulo Chileke le Jierusalemu be Zerubabelu, bu nwa Sheyalutiyelu; me Jieshuwa, bu nwa Jiozadaku ephe l'unwunna phe ndu ophuna, bu iya bu ndu-uke Chileke; me ndu Liviayi; mewaro ndu ono, e shi kpa le ndu, bu ndu ono, lwaru Jierusalemu ono bya atuko g'ephe ha wata ozi ono. Ephe hotagbaa ndu Liviayi, a -gbe le ndu nowaru ukporo apha kwaseru g'ephe buru ndu eleta enya l'ozu, eeje l'eze-ulo Chipfu. ⁹ O buru Jieshuwa yee oshilokpa iya; me abubu iya; me Kadumelu yee oshilokpa iya, bu unwu Jiuda be bu ndu eleta enya l'ozu, eeje l'ulo Chipfu; mekwapho oshilokpa Henadadu; me ndu Liviayi, unwu phe unwoke me abubu phe.

¹⁰ Ndu akpu eze-ulo Chipfu ono tpepho okpa iya; ndu-uke Chileke chita uwe uke phe yee; bya apagbaaru opu. Ndu Liviayi, bu unwu Asafu gudegbaa nkwa futu; ephe wata aja Chipfu ajaja l'uzo, Devidi, bu eze ndu Izurelu toru phe okpa iya. ¹¹ Ebu ndu ada; ephe tuko ekwe iya ekweke aja Chipfu ajaja; ekele iya ekele asuje: "O bu onye du ree.

N-yemobu iya l'anoje
 jasu le tuutuutu le
 mimiimii l'ehu
 ndu Izurelu."

Ndu ono g'ephe ha tuko tua oke uzu gude jaa Chipfu ajaja; kele a turu okpa ulo Chipfu. ¹² Ole ikpoto ndu-uke Chileke; me ndu Liviayi; me ndu-ishi l'ipfu; mbu ndu ono buwaa ogerenya ono, humahawaru ulo ke mbu pho be raru ekwa

rashia ya ike g'ephe humaru g'aatu okpa ulo ono. Igwerigwe nodu aturo uzu ehutu atushi iya ike; ¹³ k'ophu bu le ndiphe ta amadu ophu bu uzu ehutu; ozo uzu-ekwa, ephe atu; kele uzu tukouerupho swokobe atu ke wooooo; a nodu uzenya anugbaa ya.

4

Ndu akposhi g'a ta kpu ulo Chileke

¹ Noo ya; ndu ohogu ndu Jiuda yee ke ndu Benjaminu numaephe le ndu ono, e shi kpu le ndu ono akpuwa eze-ulo Chipfu, bu Chileke ke Izurelu; ² ephe byapfuta Zerubabelu; me ndu-ishi l'onu-ulo l'onu-ulo bya asu phe: "G'anyi tsonuru unu yeta eka kpu ulo ono; kele anyibedua abakwaru-a Chileke unu eja g'unubedua. Kele anyi shihawaa uzenya gweta ngweja anu iya. Anyi shiro le teke Esahadonu bu eze ndu Asiriya; mbu onye ono, duru anyi lwa eka-a ono gweta ngweja obu."

³ Obenu le Zerubabelu; me Jieshuwa; me ndu ozo, bu ishi l'onu-ulo l'onu-ulo le Izurelu be suru phe: "O to dudu iphe, anyi l'unu jigba le k'akpu Chileke anyi ulo. Oo anyibedua nwekinyi anyi be a-kpu Chipfu, bu Chileke ke Izurelu ulo ge Sayirosu, bu eze ndu Peshiya tuburu iya anyi."

⁴ Oo ya bu; ndu ali ono mee ndu Jiu tsuaha ebvu; ephe tubee eka l'akpu ulo ono. ⁵ Ndu ono je ebuko ndu mkpaka g'ephe bya akposhia iphe, ephe tuberu k'ememe. Ephe shiepho teke Sayirosu, bu eze ndu Peshiya; kpakashita iphe,

ẹphe eme gbiriri jasụ ị teke Dariyọsu bụ eze ndu Peshiya.

⁶ O be teke Kuzakusẹsu bataru l'aba-eze; ndu ọhogu ono dee ẹkwo gude epfu iphe, ẹphe sụru ị ndu bu ị mkpụkpu Jiuda meru; mẹ ndu bu ị mkpụkpu Jierúsalemụ.

⁷ O be teke Atakuzakuzẹsu bụ eze ndu Peshiya; Bishilamu; mẹ Mituredatu; mẹ Tabelu; waa ndu ọzo, ẹphe l'ẹphe aswije; dee ẹkwo-ozị nụ iya. Ẹkwo-ozị ono bẹ e gude ẹka-ẹkwo ndu Arámu dee; ọ bụkwarupho opfu-alị ndu Arámu bẹ e gude dee ya.

⁸ O bụru Rehumu, bụ nnajịoha; yẹ Shimushayi, bụ onye edeje ẹkwo bẹ deru ẹkwo-ozị ono nụ eze Atakuzakuzẹsu gude pfubyishia ndu Jierúsalemụ. Iphe, ẹphe deru l'ẹkwo-ozị ono bụ:

⁹ “Ẹkwo-ozị ọwa shi l'ẹka Rehumu, bụ nnajịoha; mẹ Shimushayi, bụ onye edeje ẹkwo; waa ndu ọzo, ẹphe l'ẹphe aswije; mbụ ndu-ikpe; mẹ ndu eze; mẹ ndu-ishi ndu Peshiya; mẹ ndu-ishi ndu Ẹreku; mẹ ndu-ishi ndu Bábilonu; mẹ ndu-ishi ndu Susa, bụ iya bụ ndu Elamu; ¹⁰ mẹwaro iphe, bụ ọhamoha ono, parụ ẹka; bya enwegbaaru ẹnya ono, bụ ndu Ọsunapa chịshiru; ẹphe je ebugbaaru ị mkpụkpu ị mkpụkpu, dụ ị Samériya; mẹ l'ẹka ọzo, dūchaa l'azụ ẹnyimụ.”

¹¹ Waa iphe, e deru l'ime ẹkwo-ozị, ẹphe deru nụ Atakuzakuzẹsu baa:

“Ẹkwo-ozị-a bẹ anyi ede anụ gube eze Atakuzakuzẹsu.

“Ndu ede iya nū bū ndu-ozì ngu; mbū anyìbe ndu ono, bu l'azū ẹnyimu:

¹² “Gẹ gùbe eze makwarū lẹ ndu Jiu ono, bū ndu shì ngu l'ẹka lwapfuta anyi-a bẹ jeshiwaru Jierúsalemú. Ẹphe akpūkwwa mkpūkpu ono, ekwefujẹ ike; bya abúkwarupho mkpūkpu ẹjo-ememe ono. Ẹphe akpū-phuwa igbulọ iya azū; atúkwwafuwa ọkpa iya. ¹³ Iphe ọzo bū gẹ gùbe eze makwarū l'a -kpūwa mkpūkpu ono; kpūa igbulọ iya bẹ ẹphe ta túbækwa utu alì ọzo; mẹ utu aswa; mẹ utu ọzo; shì nno mee g'uzo, okpoga shì erwu ndu eze ẹka rwuhu. ¹⁴ Eshì ọphu ọ bū l'ibe eze bẹ anyì shì erì nri; tẹme ọphu ọ dudu ree g'anyi hūma ẹka eeme eze iphe-iphere meru iphe anyì ezi ozi g'eze maru; ¹⁵ k'ọphu bū l'e -nyochaa ẹkwo, nna unu phẹ deshìru iphe, meru nū; unu ahūma l'ime ẹkwo ono lẹ mkpūkpu-a bū mkpūkpu ekwefujẹ ike; emejekwaphọ g'iphe tsū ndu eze l'ẹhu; mẹ iphe, búkpoo alì-eze alì-eze; mbū l'ẹjo-ememe ono búkpowaa iphe, ẹphe shì teke dū ẹnya meta. Ọ búru iya meru iphe e mebyishìru mkpūkpu ono. ¹⁶ Anyì eme gẹ gùbe eze maru l'a -kpūa mkpūkpu ono; bya akpūa igbulọ iya bẹ ọ tọ dudu iphe, byaru e-shìkwadu l'azū ẹnyimu erwu ngu ẹka ọzo.”

¹⁷ Eze bya eyee ọnu sū:

“Mu ekele Rehumu, bū nnajìoha ekele; bya ekelekwaphọ Shimushayi, bū onye edeje ẹkwo; mẹ ndu ono, bū ndu ẹphe l'ẹphe aswìje ono, bu lẹ Samériya; mẹ ndu ọphu bu l'ẹka ọzo, dū iche iche l'azū ẹnyimu azū iya ọphuu.

¹⁸ “Ẹkwo-ozì, unu nūru anyì bẹ a gūwaru gbanwee l'atatìphu mu. ¹⁹ Mu bya atūwaa

ekemu; a bya enyochawa hūma lẹ mkpukpu-a te emejedu iphe, ndu eze pfuru e -shi teke ndiche; mę l'ẹphe ekwefuje ike; eme gę ndu ọzo ta anọdujeshi eme iphe, ndu eze pfuru. ²⁰ Tẹmanu; lẹ Jierúsalemu shi nweru ndu eze, ọkpehu dọ; tẹme mkpukpu dọ igwerigwe shi nọdu phẹ l'ẹka l'azọ ẹnyimu. E shi anọduje aturu phẹ utu ali; mę utu aswa; mę utu ọzo. ²¹ Nta-a bọ g'unu tya ekemu sọ gę ndu ono te jehẹkwa ozi ono, ẹphe eje ono. G'ẹphe ta akpuekwa mkpukpu ono ọzo jasọ teke mu a-sọ g'a wata iya akpukpu. ²² Unu te ewekwa ozi ono gbẹgele gbẹgele; l'a taa ahakwa iphe, emebyi iphe g'o vu evuvu eje; shi nno emekata ndu eze."

²³ Tọbudu iya bọ; a gụepho iphe ono, eze, bọ Atakuzakuzesu deru l'ẹkwo-ozu ono, o deru nọ Rehumu; mę Shimushayi, bọ onye edeje ẹkwo; mę ndu ẹphe l'ẹphe aswiye ono; ẹphe mekebe ẹgwegwa jepfushia ndu Jiu ono, nọ lẹ Jierúsalemu ono; je ekebuta phẹ k'ike; g'ẹphe te ejehẹ ozi ono, ẹphe eje ono.

²⁴ Noo ya; ozi ono, e gude l'ẹka eje l'ulo Chileke lẹ Jierúsalemu ono; kwaa g'o jeberu; ọphu e tee jehẹdu iya jeye o rwua l'apha, kwe Dariyosu, bọ eze ndu Peshiya apha labọ, ọ wataru aburu eze.

5

Aakpuphu eze-ulo Chileke azu lẹ Jierúsalemu

¹ Tọbudu iya bọ; ndu mpfuchiru Chileke, bọ Hagayi yele Zekaraya nwa Ido bya awata epfu opfu Chileke nọaha ndu Jiu, bu lẹ Jierúsalemu; mę l'ali ndu Jiuda; mbọ l'ẹphe gude ẹpha Chileke

ke ndu Ízurelu, pfuaharu phe iya. ² Oo ya bu; Zerúbabelu nwa Sheyalutiyelu; yele Jieshuwa, bu nwa Jiozadaku wata akpu ulo Chileke ono; mbu ulo ophu du le Jierúsalemu. Ndu mp-fuchiru Chileke tsokwaru phe pho eyetaru phe eka.

³ O buru teke ono be Tatenayi, bu ochi-oha ndu bu l'azu enyimu; me Sheta-Bozenayi yele ndu ephe l'ephe aswije wu-pfutaru phe bya asu phe: “?Bu onye karu unu g'unu kpua ulo-a dozia?”

⁴ Ephe jikwaa phe pho su: “?Bu gunu bugbaa ephe ndu ono akpu ulo ono?” ⁵ Ole Chileke be nwuberu ndu bu ogerenya ndu Jiu ono enya; k'ophu bu le ndu ono ta akpohiduru phe eje ozi, ephe eje; jeye teke opfu ono rwuru Dariyosu le nchi; o dee ekwo-ozi nu g'abya akaru phe onu ya yeru le k'opfu ono.

⁶ Owaa bu iphe, e deru l'ekwo-ozi ono, Tatenayi, bu ochi-oha ndu bu l'azu enyimu deru; yee Sheta-Bozenayi; me ndu ephe l'ephe aswije, bu ndu no l'oke-okwa, bu l'azu enyimu; mbu ekwo-ozi ono, ephe deru nu eze Dariyosu. ⁷ Ekwo-ozi ono, ephe deru nu iya ono be e deru su:

Ekwo-ozi-a be anyi ede anu gube eze Dariyosu. Anyi ekele ngu ekele!

⁸ Owaa bu ge gube eze maru l'anyi jeru l'eka ndu Jiuda bu. Anyi jeshia l'ulo Chileke ono, bu onye paru eka ono; bya ahuma le ndu ono gudewaa mkpuma, ha shii akpu ulo ono; ephe zubechaa eze-itso l'ime igbulo ono. Ephe yeru ehu l'ozi ono; o nodu eje egwegwa egwegwa l'eka phe.

⁹ Anyi jĩa ndu ọ́phu bú ọ́gerenya ndu Jiuda ono sù phẹ: “?Bú onye karụ g'unu kpua ụlo ono dozia?” ¹⁰ Anyi bya ajikwaa phẹ phọ ẹ́pha phẹ; k'ọ́phu anyi e-de ẹ́pha phẹ ono edede nù ngu g'ì maru ndu-ishi ozi ono.

¹¹ Ọ́waa bú ọ́nu, ẹ́phe yeru anyi: “Anyi bú ndu-ozì kẹ́ Chileke, nwe igwe; nweru alic. Anyi akpukwa ụlo ono, a kpuhawaru teke dọ́ ẹ́nya ono; mbụ ụlo, onye eze ndu Ízurelu ono, parụ ẹ́ka apaa ono kpụjeru kpụ-tse ono. ¹² Ọ́ búru l'ọ́o lẹ́ nna anyi phẹ́ kpatsuru Chileke k'imigwe ẹ́hu-eghu meru g'o gude o woru phẹ́ ye l'ẹ́ka Nebukadineza, bú eze ndu Bábilonu; mbụ́ onye Kaludiya ono, bú iya mebyishiru ụlo-a bya achita ndu alic-a chiru lashia Bábilonu. ¹³ Ọ́ búru iya bú l'o rwua l'apha, kwe Sayirosu, bú eze ndu Bábilonu apha lanu, ọ́ wataru aburu eze; ọ́ tua ekemu; mbụ́ eze, bú Sayirosu g'a kpukwaa ụlo Chileke ono. ¹⁴ Ivu, e meru lẹ́ mkpọ́la-ododo; mẹ́ ndu ọ́phu e meru lẹ́ mkpọ́la-ochaa dobe l'ụlo Chileke, bú iya bú ono, Nebukadineza gwetajeru l'eze-ulo ono, dọ́ lẹ́ Jierusalẹ́mu je edobe l'eze-ulo agwa ndu Bábilonu bẹ́ bú eze bú Sayirosu ono l'onwiya jeru egweta iya l'eze-ulo agwa ndu Bábilonu ono. Eze Sayirosu gweru ivu ono ye l'ẹ́ka onye eekuje Sheshubaza; onye o meru ọ́chi-ọ́ha; ¹⁵ bya asu iya: ‘Gweta ivu-a gweru je edobe l'eze-ulo, dọ́ lẹ́ Jierusalẹ́mu. Ọ́zo bú g'a kpukwaa ụlo Chileke g'ọ́ nọ́du-phu azu l'ẹ́ka ọ́nohawa.’ ¹⁶ Nokwa iya bú lẹ́ Sheshubaza abya atua ọ́kpa ụlo Chileke lẹ́ Jierusalẹ́mu. Eshi teke ono bya eye nta-a bẹ́ e shi kputa iya; ọ́phu a kpụ-gheduru iya.”

17 “Oo ya bu; o -buru l’o du gube eze ree; i haa g’a v’ochaada ulo eka aakwak’obeje iphe ndu eze deru le Babilonu l’eka ono g’a maru; ? bua eviya l’eze, bu Sayirosu turu ekemu su g’a kpukwaa ulo Chileke, le Jierusalemu. Ge gube eze ezilatakwanuru anyi iphe, i chi-taru l’idzu l’obu ngu l’opfu-a.”

6

A choru ekemu, eze, bu Sayirosu turu chota

1 Tobudu iya bu; eze, bu Dariyosu bya atua ekemu; e tsoru ulo eka akwak’obeje iphe v’ochaaha le Babilonu; mbu eka a kuberu ekwo, e deshuru iphe, meru l’ali ono. 2 O buru le mkpukpu Ekubatana, bu ishi mkpukpu ndu Midiya be a v’ofutaru ekwo, a phuru aphuphu.

Iphe, e deru l’ekwo ono be suru:

3 “L’apha ke mbu, Sayirosu wataru abu eze be o turu ekemu g’a kpua ulo Chileke ono, du le Jierusalemu; su g’a kpukwaa ulo ono, bu eka aan’oduje egwe ngweja; mbu g’a tukwaa okpa iya atukwa. G’oo-habe l’eli aburu ntu-okpa ukporo eno l’iri; mgbureku iya adu ntu-okpa ukporo eno l’iri. 4 Aakpopfube iya mkpuma, ha shii uzi eto; aapfube iya itso lanu. Ugwo iya be ee-shi l’ulo eku ndu eze pfua. 5 Ozo bu; ivu, e meru le mkpola-ododo; me ke mkpola-ochaa, bu ophu Nebukadineza shi l’eze-ulo ono, du le Jierusalemu ono gweta je edobe le Babilonu; g’e gwetakota iya je edobephu azu l’eka o shi du l’eze-ulo ono.

6 “Oo ya bu ɔ gube Tatenayi, bu ɔchi-ɔha l'azu ɛnyimu; me Sheta-Bozenayi; me ndu unu l'ɛphe aswiye, bu ndu no l'oke-okwa tuko g'unu ha buru ubara yeru aka ono. 7 Ba adukwa g'unu ha onye e-je akposhi ozi ono, eeje l'ulo Chileke ono. Unu haa g'ochi-ɔha ndu Jiu; me ndu bu ɔgerenya ndu Jiu kpukwaa ulo Chileke ono g'o pfuru l'onodu iya. 8 Ozo bu le mu atu ekemu iphe, unu emeru ndu bu ɔgerenya ndu Jiu ono g'ɛphe gude kpukwaa ulo Chileke ono su: G'a pfu-dzukotaje ndu ono ugwo, ɛphe gude eme k'ulo ono rengurengu. Eka ee-shi pfa phe iya bu l'ulo eku ndu eze; mbu shita l'utu, ndu bu l'azu ɛnyimu turu; oo ya bu g'o to du iphe, a-kposhi ozi ono akposhi. 9 Iphe, bu iphe, mkpa iya duru phe; g'a nujekwa phe iya; du g'unwu oke-eswi; me ebili; m'o bu nwaturu, ee-gude egwe ngweja-akpo-oku nu Chileke k'imigwe; me witi; me unu; me mee; me manu; mbu egube ono, ndu-uke Chileke le Jierusalemu sukpoerupho g'a nu phe be aanukotajekwa phe mboku-mboku; g'a ba hakwa phe iya anunu; 10 k'ophu ɛphe e-gwe ngweja, du ree nu Chileke k'imigwe; pfukwarupho nu iya g'o kebe eze l'oma; yee unwu iya.

11 “Ozo bu le mu atukwapho ekemu su l'onye gbanweru opfu mu ono be aa-phota itso, gude ulo iya nanu; gude tsebe onye obu etsebe; teme l'e mee ulo iya obu g'o buru ikpozu. 12 Ge Chileke ono, bu iya hotaru aka ono g'o buru aka oo-buru eburu ono mebyikwaa iphe, bu ndu eze; waa iphe, bu ndu e-me g'ɛphe gbanwee opfu-a; ozoo machia aka g'ɛphe mebyia ulo Chileke-a, du le Jierusalemu. Oo mbedua, bu eze, bu Dariyosu

bẹ tūru ekemu-a. G'unu doo ẹnya lẹ mini mee iphe, ekemu-a pfuru.”

Eeye eze-ulo Chileke ono l'eka Chileke

¹³ Tòbudu iya bụ; Tatenayi, bụ ọchi-ọha l'azu ẹnnyimu; mẹ Sheta-Bozenayi; mẹ ndu ẹphe l'ẹphe aswije; bya emee iphe ono, eze, bụ Dariyọsu sūru g'e mee ono ẹgwegwa. ¹⁴ Ọo ya bụ; ndu bụ ọgerenya ndu Jiu ono nọdu akpụ ụlo ono eje l'iphu l'iphu shita l'opfu Chileke, Hagayi, bụ onye mpfuchiru Chileke yele Zekaraya, bụ nwa Ido epfu. Ẹphe kpua ụlo ono jasụ ẹphe kpughee ya ọ dū gẹ Chileke kẹ Ízurelu sūru g'ẹphe kpua ya g'ọ dū; mẹ l'uzo Sayirosu; mẹ Dariyọsu; mẹ Atakuzakuzesu, bụ ndu eze Peshiya tūru phẹ ekemu iya. ¹⁵ Ẹphe kpua ụlo ono kpughee l'abalị k'eto l'ime ọnwa Ada; l'apha, kwe eze Dariyọsu apha ishii, ọ wataru aburu eze.

¹⁶ Tòbudu iya bụ; ndu Ízurelu; mbụ ndu-uke Chileke; mẹ ndu Lívayi; mewardu ndu ono, e shi kpua lẹ ndzụ ono tuko g'ẹphe ha gude ẹhu-utso, bọo iphe; woru ụlo ono ye Chileke l'eka. ¹⁷ Ẹphe gude ukporo oke-eswi ise; mẹ ukporo ebili iri; mẹ unu unwu aturu gwee ngweja, ẹphe gude yee ụlo Chileke ono l'eka Chileke. Ẹphe gude mkpi iri l'ẹbo gwee ngweja-iphe-ẹji l'iswi ẹhu ndu Ízurelu l'opfu. Mkpi iri l'ẹbo ono nọ-chiru ẹnya ipfu iri l'ẹbo, Ízurelu nweru. ¹⁸ Ẹphe bya edobe ndu-uke Chileke l'ogiri l'ogiri; dobe ndu Lívayi l'ogbo l'ogbo phẹ g'ẹphe a-nọdu eje ozi Chileke lẹ Jierúsalemu; ẹgube e deru iya l'ekwo Mosisu.

Ọbo Ojeghata

¹⁹ O rwua l'abalì k'iri l'ẹno l'ime ọnwa mbụ; ndu ono, e shi kpua lẹ ndzụ ono ọbo ọbo Ojeghata. ²⁰ Ndu uke Chileke; mẹ ndu Lívayi bẹ a sachakọtaru; ẹphe tuko g'ẹphe ha bụru ndu mmerwu adudu l'ẹhu. Ndu Lívayi gbua nwaturu ọbo Oje-aghata l'iswi ẹhu ndu ono, e shi kpua lẹ ndzụ ono; bya egbudoru iya unwunna pẹ ono, bụ ndu-uke Chileke; bya egbudokwaru iya pọ onwophe. ²¹ Oo ya bụ; ndu Ízurelu ono, e shi kpua lẹ ndzụ ono, lwaru nụ ono tuko ria ya; mewardu ndu ono, woru onwophe dobe iche l'urwuali ono, ndu ta amadu Chileke l'alì ono emegbabe; shi nno abaru Chipfu, bụ Chileke kẹ Ízurelu ẹja. ²² Abalì ẹsaa bẹ ẹphe gude ẹhu-utso ọbo Ọbo-iphe aatajẹ buredi ekoduru ekoko; kẹle Chipfu bẹ meru g'ẹhu tso pẹ utso shii; bya emee g'eze ndu Asiriya kporu obu yeru pẹ; k'ophu bụ l'o meru g'ẹka shihu pẹ ike l'akpu ọlo Chileke ono, bụ Chileke kẹ Ízurelu.

7

Ndu Ezura du lwa Jierúsalemu

¹ Tọbudu iya bụ; abya anọo gbiriri jeye teke Atakuzakuzesu wataru abụ eze ndu Peshiya; Ezura gbalihu alala. Ezura ono bụ nwa Seraya; Seraya bụru nwa Azaríya; Azaríya bụru nwa Hilikaya; ² Hilikaya bụru nwa Shalumu; Shalumu bụru nwa Zadoku; Zadoku bụru nwa Ahitubu; ³ Ahitubu bụru nwa Amaraya; Amariya bụru nwa Azaríya; Azaríya bụru nwa Merayotu; ⁴ Merayotu bụru nwa Zerahaya; Zerahaya bụru

nwa Uzi; Uzi buru nwa Buki; ⁵ Buki buru nwa Abishuwa; Abishuwa buru nwa Finehasu; Finehasu buru nwa Eleyaza; Eleyaza buru nwa Erõnu. Erõnu buru onye-ishi ndu-uke Chileke.

⁶ O buru Ezura ono gbalihuru shi lẹ Bábilõnu lwatashia. Ezura ono bu onye ede ekwo; bya aburu onye k'ekemu Mõsisu doru enya rengurengu; mbu ekemu, Chipfu, bu Chileke ke Izurelu turu. Eze mekotaru iya iphemiphe, o rworu iya g'o meeru iya; kele aka Chipfu, bu Chileke iya du iya l'ehu. ⁷ O dukwarupho ndu Izurelu, lwakwarupho Jierusalemu teke ono; mbu l'apha, kwe eze, bu Atakuzakuzesu apha esaa, o wataru aburu eze. Ndu uke Chileke hakwarupho yiru iya; me ndu Lívayi; me ndu aguje ebvu; me ndu echeje onu-oguzo nche; me ndu eje ozi l'eze-ulo Chileke. ⁸ Ezura l'onwiya be jerwuru Jierusalemu l'onwa k'ise, bukwapho apha, kwe eze apha esaa l'abu eze iya. ⁹ O shi lẹ Bábilõnu gbeshi ije iya g'onwa mbu du l'abali mbu; rwua Jierusalemu g'onwa ise du l'abali mbu; noo kele aka-oma ke Chipfu, bu Chileke iya be du iya l'ehu. ¹⁰ Noo kele Ezura be ziberu obu iya g'o nwuta ekemu Chipfu; mekwapho iphe, o pfuru; me g'o zia iphe, Chipfu toru okpa iya; me nsõ iya l'ali Izurelu.

Ekwo-ozì, eze, bu Atakuzakuzesu deru nu Ezura

¹¹ Owaa bu iphe, e deru l'ekwo-ozì, eze, bu Atakuzakuzesu nuru Ezura, bu onye uke Chileke; buru onye edeje ekwo; mbu onye iphe,

Chipfu tūru l'ekemu; mē iphe, ọ tōru ndu Ízurelu ọkpa iya doru ẹnya:

¹² “Ekwo-ozí-a bē shí l'ẹka mube eze, bụ Atakuzakuzesu, bụ onye eze ka ndu eze. Onye mu ede iya anụ bụ Ezura, bụ onye uke Chileke; bụru onye edeje ekwo k'ekemu Chileke k'imigwe.

“Mu ekele ngu ekele.

¹³ “Mu tūru ekemu dee ya edede sụ l'iphe, bụ onye Ízurelu, nọ l'alì-eze mu; mēkpoo ndu-uke Chileke; mē ndu Lívayi, bụ onye ọogu ala Jierúsalemu; g'onye ọbu tsokwaru ngu lashia.

¹⁴ Mube eze; mē ụmadzu esaa, l'agbazijeru mu idzu bē ezi unu g'unu je amaru g'onodu dū lẹ Jiuda; mē lẹ Jierúsalemu; unu amaru g'e gude emebe ekemu Chileke unu l'ẹka ono, bụ iya bụ ekemu ono, nọ unu l'ẹka ono. ¹⁵ Iphe ọzo, unu e-mefua bụ g'unu chita mkpọla-ọchaa; mē mkpọla-ododo ono, mube eze; mē ndu ono, agbazijeru mu idzu ono gude obu anyi nụ Chileke kẹ Ízurelu; bụ onye ono, bu ebubu lẹ Jierúsalemu. ¹⁶ Unu achitafua mkpọla-ọchaa; mē mkpọla-ododo, unu a-nata lẹ Babilonu l'ophu yekobe iya; mēfua iphe ndu Ízurelu; mē ndu-uke Chileke e-gude obu phẹ nụ g'e gude mee k'ulo Chileke phẹ ọbu lẹ Jierúsalemu.

¹⁷ “Unu huma l'unu gundefutaje okpoga ono zuta oke-eswi; mē ebili; mē nwaturu, unu e-gude gwee ngweja; yele ngweja-nri, etsoje iya nū; mē ngweja iphe-angungu, l'etsojekwa iya pho. Unu e-gwe ngweja ono l'eli ẹnya ẹka eegweje ngweja l'ulo Chileke unu lẹ Jierúsalemu. ¹⁸ A bya lẹ mkpọla-ọchaa; mē mkpọla-ododo ophu

phoduru nū; gẹ gube Ezura; mẹ ndu Jiu ophuna gude iya mee iphe, dū unu ree l'uzo, o bu uche Chileke unu. ¹⁹ Iphemiphe, a nukotaru unu g'unu gude jeje ozi l'ulo Chileke unu ono be unu e-gweshikota dobe l'iphu Chileke le Jierusalemu. ²⁰ Iphe ozo, dū unu mkpa, bu iphe unu ee-gude eme k'ulo Chileke unu ono; o -buru iphe, unu nufutaje; unu eshi l'ulo eku eze wota iya nū.

²¹ “Nta be mbedua, bu eze Atakuzakuzesu atu ekemu ede iya edede anu iphe, bu ndu akwakobeje okpoga l'azu enyimu azu iya ophuu su: Iphe, bu iphe Ezura, bu onye uke Chileke; bya aburu onye edeje ekwo k'ekemu Chileke k'imigwe suru g'unu nu iya; unu nujekwa iya iphe o bu. ²² Je akpaa l'okpoga mkpola-ochaa, du ukporo ise; me ogbongu witi, du ukporo ise; me ite-mee, du ukporo ise; me ekpemu manu, du ukporo ise; me unu; ole unu b'a ta sudu lo waa g'oo-jeberu. ²³ Iphe, Chileke k'imigwe turu l'ekemu; g'e mekwaa ya rengurengu; mbu iphe, a turu l'ekemu g'e mee l'ulo Chileke k'imigwe; a -nonyanu oke ehueghu iya dapfuta ali-eze iya; yee k'unwu iya. ²⁴ Ozo bu l'anyi emekwapho go doo unu enya l'a dachiwaru unu anata utu-ali; me utu-aswa; me utu-uzo l'eka ndu-uke Chileke; me l'eka ndu Liviayi; me l'eka ndu aguje ebvu; me l'eka ndu echeje onu-oguzo nche; me l'eka ndu eje ozi l'eze-ulo Chileke; me l'eka ndu ozo, ejekpoo ozi l'ulo Chileke.

²⁵ “Gẹ gube Ezura gude mmamiphe, Chileke ngu nuru ngu gude hota ndu-ikpe; me ndu anoduje edoshi opfu g'ephe kpeje ikpe, pfuru oto l'opfu ehue iphe, bukpoo ndu bu l'azu enyimu;

mbụ iphe, bụkpoo ndu maru ekemu Chileke ngu. Uno eworu ekemu ono zia ndu amadụ ekemu g'ephe maru iya. ²⁶ Iphe, bụ onye jikaru eme iphe, ekemu Chileke ngu pfuru; mę iphe, ekemu eze pfuru; g'e kpee onye obu ikpe, shihuru ike; g'e kpee ya mpfugbu; ozoo l'achifu onye obu achifu; ozoo l'e gweta iphe, o nweru; ozoo l'a tųa ya mkporo."

Ezura etu Chileke epha

²⁷ G'ajaja bųru kę Chipfu; mbụ Chileke kę nna anyi phe; onye meru g'egube iphe owa dų eze l'obu kę g'o mee g'ulo Chipfu ono, dų lę Jierusalemu bųru eka dų ubvų. ²⁸ Yębe onye meru gę n-yemobu eze; mę kę ndu anoduje agbaziru eze idzu rwube mu eka; mę n-yemobu kę ndu bųkpoo ndu ike dų, bų ndu-ozu eze. Obu bę shihuru mu ike shii; noo kęle eka Chileke bę dų mu l'ęhu. O bųru iya meru g'o gude mu dų ike chikota ndu-ishi lę İzurelu; ephe tsoru mu; anyi lasha.

8

Epha ndu ephe lę Ezura swi lwa

¹ Owaa bų epha ndu bųgbaa ishi l'onu-ulo nna phe; tęmanu owa-a bųru ekwo, e deshuru epha phe g'e gude nwua phe; mbų ndu ono, mu l'ephe shi lę Babilonu swiru lwa teke Atakuzakuzęsu bų eze:

² Onye-ishi ndu oshilokpa
 Finehasu bų Geshomu.
 Onye-ishi ndu oshilokpa
 Itama bųru Danęlu.

Onye-ishi ndu Nwa Dévidi
 bụru Hatushi,
³ bụ nwa Shekanaya.

Onye-ishi ndu oshilọkpa
 Paroshi bụ Zekaraya.
 Ndu ẹphe l'iya swị,
 bụkwanu ndu e deru l'ekwo,
 e deshiru g'e gude nwua pẹ
 dụ unwoke ụkporo ẹsaa l'iri.

⁴ Onye-ishi ndu oshilọkpa
 Pahatu-Mówabu bụ
 Eliyowenayi nwa Zerahaya.
 Ndu ẹphe l'iya swị dụ
 unwoke ụkporo iri.

⁵ Onye-ishi ndu oshilọkpa
 Zatu bụ Shekanaya nwa
 Jiahaziyelu. Ndu ẹphe l'iya
 swị dụ unwoke ụkporo
 iri l'ise.

⁶ Onye-ishi ndu oshilọkpa
 Adinu bụ Ẹbedu nwa
 Jionatanu. Ndu ẹphe l'iya
 swị dụ unwoke ụkporo
 labọ l'iri.

⁷ Onye-ishi ndu oshilọkpa
 Elamu bụ Jieshaya nwa
 Atalaya. Ndu ẹphe l'iya
 swị dụ unwoke ụkporo
 ẹto l'iri.

⁸ Onye-ishi ndu oshilọkpa
 Shefataya bụ Zebadaya
 nwa Mayikelu. Ndu ẹphe
 l'iya swị dụ unwoke

ụkporo ẹno.

- 9 Onye-ishi ndu oshilọkpa
 Jiowabu bụ Obedaya nwa
 Jiehiyelu. Ndu ẹphe l'iya
 swị dụ unwoke ụkporo iri
 l'unwoke iri l'ẹsato.
- 10 Onye-ishi ndu oshilọkpa
 Bani bụ Shelomiti nwa
 Jiosifaya. Ndu ẹphe l'iya
 swị dụ unwoke ụkporo
 ẹsato.
- 11 Onye-ishi ndu oshilọkpa
 Bebayi bụ Zekaraya nwa
 Bebayi. Ndu ẹphe l'iya swị
 dụ unwoke ụkporo l'ẹsato.
- 12 Onye-ishi ndu oshilọkpa
 Azugadu bụ Jiohananu
 nwa Hakatanu. Ndu ẹphe
 l'iya swị dụ unwoke ụkporo
 ise l'unwoke iri.
- 13 Onye-ishi ndu oshilọkpa
 Adonikamu bẹ bụ pẹ
 byakpechaaru azụ. Ẹpha
 pẹ bụ Elifeletu; mẹ Jiyuwelu;
 mẹ Shemaya. Ndu ẹphe l'ẹphe
 swị dụ unwoke ụkporo ẹto.
- 14 Onye-ishi ndu shilọkpa
 Biguvayi bụ Utayi; mẹ
 Zaku. Ndu ẹphe l'ẹphe swị
 dụ unwoke ụkporo ẹto
 l'unwoke iri.

Ezura Achọ ndu a-nọdu eje ozi l'eze ụlo Chileke

15 Mu bya achikobe phe l'aguga enyimu ono, l'aso ala Ahava. Anyi kpobe ulo-ekwa anyi l'eka ono no ujiku eto. Mu bya elekota enya le ndu ono g'ephe ha; me ndu-uke Chileke; huma l'o to dudu m'onye Lívayi, no l'eka ono. 16 Tobudu iya bu; mu zia g'e je ekua Eliyéza; me Ariyelu; me Shemaya; me Elunatanu; me Jiaribu; me Elunatanu; me Nétanu; me Zekaraya; me Meshulamu, bu ndu-ishi. Mu kukwapho Jioyaribu; me Elunatanu, bu ndu iphe edoje enya. 17 O buru Ido, bu onye-ishi phe le mkpukpu Kasifiya be mu ziru phe g'ephe jepfu. Mu karu phe iphe, ephe e-pfuru Ido; me ndu nkiya phe; mbu ndu ono, l'eje ozi l'eze-ulo, du le Kasifiya l'eka ono; g'ephe zia ndu a-byapfuta anyi bya eje ozi l'ulo Chileke anyi.

18 O buru l'oo le Chileke doberu anyi eka oma iya l'ehu meru g'o gude ephe dutaru anyi onye iphe edoje enya; mbu oshilokpa Mahuli, epha iya bu Sherebaya. Mahuli bu nwa Lívayi; Lívayi buru nwa ke Izurelu. Unwu Sherabaya; me ndibe phe be du iri l'esato. 19 Ndu ozo bu Hashabaya; me Jieshaya, bu oshilokpa Merari. Ndibe phe me unwune iya k'unwoke be du ukporo. 20 Ndu ozo, ephe dutafuaru le ndu eje ozi l'eze-ulo ono du ukporo iri le nanu. Ndu ono bu ndu Dévidi; yele ndu-ishi ozi iya hotaru g'ephe yetajeru ndu Lívayi eka. Ndu ono g'ephe ha be e deshikotaru epha phe l'ekwo.

Aswi egu epfu anu Chileke

21 Tobudu iya bu; mu bya araa ya arara su g'a swia egu l'eka ono; mbu l'enyimu Ahava

ono. K'ophu anyi e-shi nno wozeta onwanyi ali l'atatiphu Chileke anyi; rwọo ya g'o duru anyi l'unwegirima anyi; me ivu anyi shia uto ophu ka ree. ²² Kele iphere du mu ke ge mu jepfu eze je arwo ya g'o yeru anyi ikpoto ndu ojogu; me ndu agba l'inya g'ephe dua anyi l'uzo m'obvu ndu ohogu. Eshi ophu anyi gudewaa onu anyi su eze: "Eka-oma Chileke anyi be aduje l'ehu ndu bukpo, ndu achọ iya nu g'ee-shi g'o duru phe le ree. Ole okpehu iya; me oke ehu-eghu iya be aduje l'ehu iphemiphe bu ndu jikaru iya nu." ²³ Oo ya bu; anyi swia egu rwọo Chileke anyi k'iphe ono. O meeru anyi iphe, anyi suru g'o meeru anyi.

Iphe, a nuru g'e gude mee iphe l'eze-ulo Chileke

²⁴ Tobudu iya bu; mu woru umadzu iri l'ebopho, bu ndu-ishi ndu-ishi-uke Chileke dobe iche; mbu Sherebaya; me Hashabaya; mewaro ndibe phe umadzu iri ophuna. ²⁵ Mu bya atukota erwa mkpola-ochaa; me mkpola-ododo; me ivu; mekpoo iphemiphe, ndu eze; me ndu-uke Chileke; me ndu l'agbazijeru eze idzu; me ndu o meru ishi; me ndu Izurelu l'ophu, no l'eka ono nuru g'e gude eje ozi l'ulo Chileke. ²⁶ Mu tua erwa iphe ono goshi phe. Iphe, erwa mkpola-ochaa du buru unu talentu l'ukporo talentu iri l'ebopho le talentu iri; ivu, e meru le mkpola-ochaa be erwa iya du ukporo talentu ise. Erwa ke mkpola-ododo du ukporo talentu ise. ²⁷ Iphe ozo bu gbamugbamu, e meru le mkpola-ododo, dataru unu dariku labo l'ukporo iri; me ivu labo,

e meru l'òkpobe onyirubvu, eke ododo ododo, vukwaphọ ọnu aswa gẹ kẹ mkpọla-ododo.

²⁸ Mu sù phẹ: Unu dọru Chipfu nsọ; onokwaphọ g'ivu-a g'ọ ha dọkotaru iya nsọ bụ ono. Mkpọla-ọchaa; mẹ mkpọla-ododo ono bụ iphe, ndiphe turu obu phẹ onyo nù Chipfu, bụ Chileke kẹ nna unu phẹ. ²⁹ Unu letakwa phẹ ẹnya ree jeye teke unu a-tụ ẹrwa iya l'atatiphu ndu-ishi ndu-uke Chileke; mẹ ndu-ishi ndu Lívayi; mẹ ndu-ishi l'ọnu-ọlo nna phẹ lẹ Ízurelu. Ọ bụru l'ime mkpuru, dọchaa l'ọlo Chileke lẹ Jierúsalemu bẹ unu a-nọdu tụa ẹrwa iphe ono goshi phẹ. ³⁰ Ọo ya bụ; ndu-uke Chileke chita mkpọla-ọchaa ono; mẹ mkpọla-ododo ono; mẹ ivu ono, a tųwaru ẹrwa iya atųtu ono; gude jeshia l'ọlo Chileke anyi lẹ Jierúsalemu.

³¹ Tọbudu iya bụ; o rwua g'ọnwa mbụ dọ l'abalị iri l'ẹbo; anyi shi l'enyimu Ahava gbalihu jeshia Jierúsalemu. Ẹka Chileke anyi dọ anyi l'ẹhu; o shi nno nafuta anyi l'ẹka ndu ọhogu; mẹ l'ẹka ndu ana nfu, kwakachaa anyi l'uzo. ³² Anyi rwua Jierúsalemu bya anọ ujiku ẹto l'ẹka ono. ³³ O be mbọku k'eno iya; anyi nọdu l'ọlo Chileke tụa ẹrwa mkpọla-ọchaa; mẹ mkpọla-ododo; mẹ ivu ozo, dọ nsọ; woru ye l'ẹka Meremotu, bụ nwa Uráya, bụ onye uke Chileke. Eleyaza nwa Finehasu bẹ yẹe ya nọgbabe. Ndu tso phẹ nọdu l'ẹka ono bụ ndu Lívayi; mẹ Jiozabadu nwa Jieshuwa; mẹ Nowadaya nwa Binuyi. ³⁴ Iphemiphe ono bẹ a guru ọgu; tụa ẹrwa iya atųtu; bya edeshikọta ẹrwa iya ono l'ẹkwo teke ono.

35 Ozo bu lẹ ndu ono, e shi kpua lẹ ndzụ ono; mbụ ndu ono, shi l'ẹka ono, e shi kpua phẹ lẹ ndzụ lwa ono bẹ gweru ngweja-akpo-oku nụ Chileke kẹ Ízurelu. Epe gburu oke-eswi iri l'ẹbo l'ehu ndu Ízurelu l'ophu; gbua ebili ukporo ẹno l'iri l'ishii; mẹ unwu aturu ukporo ẹto l'iri l'esaa; bya egbua mkpi iri l'ẹbo, e gude gwee ngweja-iphẹ-ẹji. Ngweja ono g'ọ ha bẹ a kpokotaru oku nụ Chipfu. 36 Epe zia ozi ono, eze ziru ndu no-chiru ẹnya eze; mẹ ndu bu ọchi-oha; l'azu ẹnyimu azu iya ophuu. Ndu ono bya eyeru ndu Jiu ono ẹka; yetakwapho ẹka l'akpu ulo Chileke ono.

9

Ezura epfu anụ Chileke kẹ ndu Jiu, alụ nwanyị ẹghirigha

1 E mechaepho iphemiphe ono; ndu-ishi byapfutashia mu bya asu mu: "Ndu Ízurelu je akpaa lẹ ndu-uke Chileke; mẹ ndu Lívayi bẹ jikakwaru edobe onwophe iche l'ẹka ndu ali-a no; epe tsoakwaru eyephe ẹka l'akpamara, ndu ali-a l'anoduje emegbabe; mbụ ndu Kénanu; mẹ ndu Hetu; mẹ ndu Pérezu; mẹ Jiebusu; mẹ ndu Amonu; mẹ ndu Mówabu; mẹ ndu Ijiputu; mẹ ndu Amoru. 2 Epe watawaru aluta unwada ndu ali-a k'onwophe; bya alutakwaru phẹ pho unwu phẹ; k'ophu bu lẹ ndu ono, du nsọ ono bẹ watawaru onwophe tugbabe l'ehu ndu ali-a. O buru ndu-ishi; mẹ iphe, bu ndu no l'oke okwa bẹ ẹka phẹ kangoru l'eme ẹjo-iphẹ ono." 3 Mu numaepho iphe ono; mu lajashia uwe mu;

lajashĩa uwe mgbalanụ mu; mu pheta onwomu ẹgbushi l'ishi; pheta ẹjí l'agba; bya anọ-zeta anọ; ẹdzu nọdu eswi mu l'ẹhu. ⁴ Tọbudu iya bu; iphe, bukpoo ndu ndzụ gụhuru l'ẹka ẹphe numaru opfu, o pfuru mbụ Chileke kẹ Ízurelu lẹ k'emeswe ono, ndu ono, a kpuru lẹ ndzụ phọ, lwaru nụ phọ mesweru ono; bya egbuphe mu mgburugburu; mu nọdu gẹ mu nọ jeye teke eegweje ẹja ụzenyashi; ẹdzu nọdu eswię mu phọ l'ẹhu.

⁵ O beępho l'egwe ẹja ụzenyashi ono; mu shi l'enyoru, mu gwọru gbalihu; yele uwe mu phọ, mu lajashiru phọ; mę uwe mgbalanụ mu phọ, mu lajashiru phọ; bya ephureta gbushi ikpere l'alị chiliaru Chipfu, bu Chileke mu ẹka mu labọ imeli; ⁶ pfuru nụ iya sụ: “Gube Chileke nkemu; iphere dụ mu; tẹme ẹhu rwuhukwa mu phọ gẹ mu e-shi palia ẹnya lee gube Chileke mu; iphe, kparu iya nụ buru l'ẹjo-iphe, anyi eme bẹ kawa anyi l'eli; tẹmanu ikpe, nmaru anyi rwuwaa imigwe. ⁷ E -shi teke nna anyi phẹ nọ; rwua ntanụ-a bẹ ikpe, paru ẹka nmaakwaru anyi. O buru ẹjo-iphe, anyi emegbabẹ bẹ meru g'o gude e woru anyịbedua; mę ndu eze anyi phẹ; mę ndu-uke Chileke anyi phẹ ye ndu eze ndu alị-a l'ẹka ẹphe gude ogu-echi gbushia anyi; kpukoo anyi lẹ ndzụ; kwaa iphe anyi l'ọkwata; ẹphe nọdu eme anyi iphe-iphere ẹgube ono, ẹphe eme iya anyi ntanụ-a. ⁸ Ole kẹ nwanta bẹ gube Chipfu, bu Chileke mewaru anyi iphe-oma; kele i meru anyi nweru nwa ndu ophu, phoduru nụ; bya emee g'anyi nguru anguru l'ẹka-a, duru

ngu nsọ-a; k'ọphu bụ ịe gube Chileke anyi e-me g'anya sahu anyi; bya emekwapho g'anyi shi l'abu ohu, anyi bu-a jakerehu. ⁹ Anyi shi buru ndu ohu; ole gube Chileke ta ahaduru anyi g'anyi kwawaroo ya l'abu ohu ono. I goshiru l'iphuru anyi obu-imemini l'ataphu ndu eze ndu Peshiya; i meru anyi jakerehu; shi nno mee g'anyi kpukwaaru gube Chileke anyi ulo ngu; me g'anyi kpukwachaa aka o mebyishihuru; teme i mee g'anyi nweru igbulo le Jiuda me le Jierusalemu.

¹⁰ "Gube Chileke anyi; ?bu gunu be anyi epfu me e -mechaa; kele anyi gwobewaru eme ekemu ngu ono. ¹¹ Mbụ ekemu ono, i turu shita l'aka ndu-ozu ngu ono, bu ndu mpfuchiru su: 'Ali ono, unu eje eburu ono be bu ali, ndu bu iya nu pharwushiru apharwushi. O buru akpamara, ephe eme; yele ahuma ahuma be jiru ali ono shita l'ishi iya lanu rwua l'ishi iya ophu. ¹² Oo ya bu; g'unu b'e wokwaru unwada unu kee unwu phe unwoke; ophu unu alutakwa unwada nkephe duru nu unwu unu unwoke. Unu l'ephe ba anodukwa le nchi-adu-doo; ozoo g'unu choo iphe a-nodu ejehuru phe nu; k'ophu unu e-shihu ike; ria iphe-oma, shi l'ali ono; unu eme go buru okiphe unwu unu jasuru l'ojejoje ono.' ¹³ Iphe, nwuru anyi buru l'ejo-iphe, anyi meru; me l'ikpe, nmaru anyi ono be o shi. Ole iphe, du eji, anyi meru be ka shii eme l'ahuhu gube Chileke anyi huru anyi; temanu i mee g'anyi nweru nwa ndu owana, phoduru nu-a. ¹⁴ ?O gbaru g'anyi mebyibaa ekemu ngu ozo; ke g'anyi le ndu ono, eme akpamara ono kegbajeru nwanyi ozo? ?

Anyi te emedu ehu eghua ngu eghu ghumihu k'ophu ii-me anyi alakota l'iyi k'ophu o to duedu onye aphodu nu; ophu o duedu onye anahu nu? ¹⁵ Gube Chipfu, bu Chileke ke Izurelu; i bu onye pfuberekoto; kele anyi nweru nwa ndu ophu phoduru nu ntanu-a; mbu nwa ndu ophu nahuru nu. Huma g'anyi pfuru l'iphu ngu buru ndu-ikpe nmaru; mbu l'o meru ophu o to dudu onye a-du ike pfuru l'ataphu ngu."

10

Ndu Jiu akoshiru Chileke iphe-iji phe

¹ Ge Ezura epfu anu Chileke; akoshiru Chileke iphe, du eji, ephe megbaberu; ara ekwa; echi onwiya gbaagbaa l'ali l'ataphu ulo Chileke; ndu Izurelu zefuta igwerigwe wu-pfuta iya; unwoke; me unwanyi; me unwegirima; ephebedua nodu arakwapho ekwa nkephe arashi iya ike. ² Shekanaya, bu nwa Jiehiyelu; onye lanu l'ime ndu shi l'eri Elamu bya epfuru nu Ezura su iya: "Anyi meakwaru ge Chileke anyi te egudehe ire anyi aka; noo kele anyi jeru je alushia unwanyi ndu ohozo; mbu unwanyi ndu ali-a. Ole g'o duhabe be ndu Izurelu dulekwarua iphe, ephe a-nodu ele enya iya. ³ Oo ya bu; g'anyi le Chileke anyi gbanaa ndzu; l'anyi l'a-chishikota unwanyi ono, anyi lushiru ono; me unwegirima, ephe nwushiru, bu iya bu egube ono nnajuphu mu chiru idzu iya; me ndu ono, anoduje atsụ ekemu Chileke anyi ebvu ono. Ozo bu l'anyi e-me iya g'ekemu pfuru. ⁴ Gbalihu; o kwa ngu be opfu-a

dụ l'ẹka; anyịbedua bẹ aa-pfukwaru ngu-a l'azu. Shihu obu ike mee ya.”

⁵ Oo ya bụ; Ezura gbalihu; bya emee gẹ ndu-ishi ndu-uke Chileke; mę ndu Lívayi; mę ndu Ízurelu l'ophu ribua nte l'ẹphe e-me iphe ono g'e pfuru iya. Ẹphe tuko g'ẹphe ha ria nte ono. ⁶ Noo ya; Ezura bya alufu l'atathu ọlo Chileke ono; tugbua ọ buru iya eje l'ọlo Jiehoananu nwa Elyashibu. O rwua ẹka ono; ọ jika eri nri; jika angu mini; kele ọogukwadu aphụ lẹ ndu ono, e shi kpua lẹ ndzụ ono bẹ e te gudedu ire phe ẹka.

⁷ A bya atuko Jiuda; mę Jierúsalemu l'ophu raa ya arara gẹ ndu ono, e shi kpua lẹ ndzụ ono tuko dzukota lẹ Jierúsalemu. ⁸ L'iphe, bụ onye ta abyaduru l'ime abali ẹto iya bẹ ee-gwe ivu iya; chifu onye ọbu g'ọ bọ yihe l'ogbo, e shi kpua lẹ ndzụ. O buru gẹ ndu-ishi; mę ndu bụ ọgerenya chiru idzu iya bụ ono.

⁹ Tọbudu iya bụ; unwoke ndu Jiuda mę ndu ke Benjaminu tuko g'ẹphe ha dzukota lẹ Jierúsalemu l'ime abali ẹto ono. Mbọku ono bụ mbọku onwa ke tete dụ l'ukporo abali. Ndu ono g'ẹphe ha nọdugbaa l'oma etsuzo l'atathu ọlo Chileke l'ẹka ono. Iphe ono; yee eze mini ono, edze nụ ono mee; ẹhu nọdu etegbaa phe etete. ¹⁰ Ezura, bụ onye uke Chileke gbalihu sụ phe: “Unu mewaru; ọphu egudedu ire unu ẹka; kele unu lushiru unwanyi ndu ọhozo; shi nno mee g'ikpe kaba anma unube ndu Ízurelu. ¹¹ Oo ya bụ; unu tuko iphe-aji, unu meru koshiaru Chipfu, bụ Chileke ke nna unu phe; unu awata eme iphe, dụ iya ree. Unu bufu onwunu l'ẹka

ndu ali-a nọ; mę l'ęka ụnwanyi ndu ọhozo ono, unu lushiru ono nọ.”

¹² Ndu ono, dzukoberu l'ęka ono tųa ọzu sų: “Ọ kpọepho iphe, i pfuru bę anyi e-me. ¹³ Obenu lę ndu kuru l'ęka-a parų igwerigwe; teme ọ buru udzumini; k'ọphu anyi taa apfukotaduru l'etezi. Ọzo bu l'iphe-a ta abudu iphe, ee-mekota ujiku lanų; ọzoo ujiku labọ; noo kele iphe ono mewaru anyi meswewa shingushingu. ¹⁴ Gę ndu-ishi igwe-ọha-a pfunuru; g'iphe, bukpo ndu ndu-anyi lę mkpukpu lę mkpukpu, bu ndu luru ụnwanyi ndu ọhozo; byakota l'iphu phe; g'ephe byaje mboku, a suru g'ephe bya. Epe -nọdu abya; epe lę ndu ọgerenya lę mkpukpu lę mkpukpu aswjeru; mekwapho ndu-ikpe; jeye teke Chileke e-wofu oke ẹhu-eghu iya ono, l'enwu g'ọku l'ẹhu anyi ono.” ¹⁵ Ọ buerupho Jionatanu nwa Asahelu; yele Jiazaya nwa Tikuva kpoloko bę bu ndu jikaru iphe ono, e pfuru ono. Meshulamu; mę Shabetayi nọdu agba eyeru phe.

¹⁶ Ndu ono, e shi kpua lę ndzų ono, lwarų nu ono mee iphe ono, e pfuru ono. Ezura, bu onye uke Chileke hota unwoke, bu ndu-ishi l'onu-ulo nna phe; deshia epha phe l'ekwo. Ọ hota phe g'onu-ulo phe hakota. Ọ beepho l'abalị mbu l'onwa k'iri; epe nọdu pfushia opfu ono. ¹⁷ Ọ buru g'onwa ke mbu du l'abalị mbu bę epe pfugheru opfu ẹhu ndu ono, luru ụnwanyi ndu ọhozo ono.

Unwoke, luru ụnwanyi ndu ọhozo

¹⁸ A -bya l'echilabọ ndu-uke Chileke bę bu ndu ọwa-a luru ụnwanyi ndu ọhozo ono: Ndu shi

l'eri Jieshuwa nwa Jiozadaku; yę unwune iya ke nwoke, luru unwanyi ndu ohozo ono bu: Maseya; me Eliyęza; me Jiaribu; me Gedalaya.
¹⁹ Ndu ono g'ęphe ha be tukoru kweta ukwe l'ęphe a-chishikota unyomu phe ono, ęphe luru l'ohozo ono. Onyenonu l'ime phe shi l'igwe-aturu iya kputa ebili lanu nu g'e gude gwee ngweja-apfu-ugwo.

²⁰ Ndu shi l'eri Ima, luru phe nu bu: Hanani; me Zebadaya.

²¹ Ndu shi l'eri Harimu, luru phe nu bu: Maseya; me Elayijia; me Shemaya; me Jiehiyelu; me Uzaya.

²² Ndu shi l'eri Pasho, luru phe nu bu: Eliyowenayi; me Maseya; me Ishimelu; me Netanelu; me Jiozabadu; me Eleyasa.

²³ A bya le ndu Lıvayi; ndu luru unwanyi ndu ohozo bu: Jiozabadu; me Shimeyi; me Kelaya, bukwapho onye eekuje Kelita; me Petahaya; me Jiuda; me Eliyęza.

²⁴ A bya le ndu aguje ebvu be bu Eliyashibu bu onye luru nwanyi ndu ohozo.

Le ndu nche-onu-oguzo buru Shalumu; me Telemu; me Uri bu ndu luru unwanyi ndu ohozo.

²⁵ A bya le ndu İzurelu ozo, luru unwanyi ohozo ono:

Ndu shi l'eri Paroshi, luru phe nu bu: Ramaya; me Izaya; me Malukayijia; me Mijiaminu; me Eleyaza; me Hashabaya; me Benaya.

²⁶ Ndu shi l'eri Elamu, luru phe nu bu: Matanaya; me Zekaraya; me Jiehiyelu; me Abudi; me Jieremotu; me Elayijia.

²⁷ Ndu shi l'eri Zatu, luru phe nu bu: Eliy-owenayi; me Eliyashibu; me Matanaya; me Jieremotu; me Zabadu; me Azayiza.

²⁸ Ndu shi l'eri Bebayi, luru phe nu bu: Jieho-hananu; me Hananaya; me Zabayi; me Atulayi.

²⁹ Ndu shi l'eri Bani, luru phe nu bu: Meshu-lamu; me Maluku; me Adaya; me Jiashubu; me Sheyalu; me Jieremotu.

³⁰ Ndu shi l'eri Pahatu Mowabu, luru phe nu bu: Aduna; me Kelalu; me Benaya; me Maseya; me Matanaya; me Bezaletu; me Binuyi; me Manase.

³¹ Ndu shi l'eri Harimu, luru phe nu bu: Eliyeza; me Ishaya; me Malukayijia; me Shemaya; me Simiyonu; ³² me Benjiaminu; me Maluku; me Shemaraya.

³³ Ndu shi l'eri Hashumu, luru phe nu bu: Matenayi; me Matata; me Zabadu; me Elifletu; me Jieremayi; me Manase; me Shimeyi.

³⁴ Ndu shi l'eri Bani, luru phe nu bu: Madayi; me Amuramu; me Uwele; ³⁵ me Benaya; me Bedeya; me Keluhi; ³⁶ me Vanaya; me Meremotu; me Eliyashibu; ³⁷ me Matanaya; me Matenayi; me Jiasu.

³⁸ Ndu shi l'eri Binuyi, luru phe nu bu: Shimeyi; ³⁹ me Shelemaya; me Netanu; me Adaya; ⁴⁰ me Makunadebayi; me Shashayi; me Sharayi; ⁴¹ me Azarelu; me Shelemaya; me Shemaraya; ⁴² me Shalumu; me Amaraya; me Jiosefu.

⁴³ Ndu shi l'eri Nebo, luru phe nū bū: Jieyelu; mē Matitaya; mē Zabadu; mē Zebina; mē Jiadayi; mē Jiowelu; mē Benaya.

⁴⁴ Ndu ono g'ephe ha bē shi lukota unwanyi ndu ohozo; mbū l'ọ dūru ndu ophu unwanyi ono shi yechawaru unwegirima.

Bayiburu Izii
Izii: Bayiburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

c6885c7c-c550-5b8b-a4fe-4bd714af4f6d